

TICO CROES TA DIRIGI CARTA PA MIEMBRO DI PARLAMENTO NEL DE CUBA

ORANJESTAD (IPA-AC) - Ayera 14 di Juli 1993 Miembro di Parlamento pa partido AVP sr. Tico Croes, a dirigi un carta pa miembro di Staten Sr. L.S. de Cuba.

Contenido di e carta ta como lo siguiente.

"Awe mi a scuchabo papia na radio y mi ta kere cu hunto cu mi Pueblo atrobe a perde un speranza cu ainda tabata biba".

"Caminda cu nos por tabatin speranza cu abo como politico nobo lo ta un di esnan cu lo trata di cambia e politica di MEP di mentira, corrupcion y ladronicia, awe scuchando bo na radio tur hende por a compronde cu abo mesco cu mayoria di e politiconan bieuw di MEP no a cambia, apesar di promesanan ahci despues di boso derota durante e ultimo eleccion".

"Al contrario, boso ta sigui boso politica di mentiranan baho y vil pa purba hustifica e maneho criminal cu boso gobierno a hiba y ta hibando contra di nos Pueblo".

Mas boso lanza mentiranan mas rabia Pueblo ta hay contra boso y mas lo boso mester paga pa e mentiranan aki.

Cada uno di boso

mester realisa cu ningun momento e granatiano duna pa e gobierno di AVP cu sosten den Staten di henter fraccion di MEP, a costa nos pueblo te cu awe ni un cent preto.

Pero loke si a y ta costando nos Pueblo miyones di florin ta e maneho cua pone 2000 amigo politico ariba payroll di pueblo.


Tambe loke a costa pueblo un dineral ta e sumanan fabuloso cu boso gobierno a paga na un solo carrental, e sumanan cu te awe nos no sa exactamente e magnitud cu a wordo paga na un solo oficina di abogado.

Ta pesey si nos mester busca un nomber pa e medidanan inhusto cu Bosokier impone contra boluntad di nos pueblo, nos lo mester yama e medidanan aki "belasting di ladronicia".

Esaki ta fuera di tur otro corrupcion cu a tuma luga durante e goierno cu bo ta sostiene awe.

Ta esakinan a causa cu awe bosonan ta bay castiga pueblo cu medidanan severo cu berdad merece un solo nomber: "belasting di ladronicia".

Colega nos ta spera cu ainda prome cu ta laat



bosonan lo realisa cu no por sigui hiba un politica di mentira y trata di culpa otro a base di e mentiranan aki.

Bo mester ta conciente cu mentiranan lo no wordo lubida hamas y tampoco lo lubida kende ta esnan cu ta haciendo esaki.

Pueblo a harta di e desgracia cu boso coalicion a trece pa Aruba y tambe Pueblo a harta di turesnancieciamente ta sigui purba di mal informa

nos comunidad.

Ta imposibel pa hiba un maneho fatal manera a wordo hiba door di e actual coalicion di MEP, ADN y PPA, y awor cu e cuenta ta wordo presenta, bosonan no tin siquiera e desencia pa carga loke boso a causa, pero ta busca otro pa culpa. Esaki ta crea un enemistad profundo y lo tin consecuencianan grave.

E mentiranan aki no solamente ta un acto obstina di bo banda di ignorancia, pero

pio ainda nan ta un acto di un irresponsabilidad grotesco, pasobra nan ta provocando rabia y ta conduciendo nos pueblo na un rebeldia masivo.

Colega de Cuba ainda tin tempo, ainda no ta laat pa bo rectifica bo rumbo y di bo partido. Tin dos escogencia Bo dilanti y cada escogencia tin su consecuencia.

Bo por scoge pa keda tapa y mantene corrupcion, fraude, ladronicia, escandalonan, faboritismo y privilegio. Of bo por scoge pa redoblacion di pension di nos grandinan, aumento di onderstand y salario minimo, alivio pa esnan den mas necesidad y mas debil den nos Pueblo, pa felicidad y tranquilidad di nos Pueblo.

Si bo mester sigui cu mentiranan y medidanan contra di nos pueblo lo bo topa nos den un lucha incondicional hunto cu nos pueblo den e barricadanan di husticia den tur bario di Aruba.

Pasobra husticia no conoce frontera, region, color politico, clase ni edad y husticia tampoco comoce cobardenan. E unico actitud cu husticia conoce ta nobleza, sacrificio, sinceridad y sentimiento humano. Pueblo ta enespera di Bo escogencia.